

四庫全書

史部

欽定四庫全書

欽定續通志卷一百二十

謚畧

宋蘇洵嘉祐謚法增多謚

臣等謹案謚法之書自周書獨斷而後見於隋唐
宋志及晁公武郡齋讀書志者有劉熙謚法三卷
沈約謚法十卷賀琛謚法五卷王彥威續古今謚
法十四卷李涪謚法三卷范正周沅編六家謚法

二十卷蘇洵嘉祐謚法三卷皇祐謚錄二十卷劉
熙之書久軼今不可考沈約賀琛之書羅泌以為
皆本于廣謚晁公武謂沈約撰七百九十四條賀
琛加婦人謚二百三十八條意其時去漢未遠師
承有自王彥威以下轉相祖述必有可觀惜其書
今皆不存惟蘇洵嘉祐謚法三卷見于本集其皇
祐謚錄亦缺如矣考洵于嘉祐六年與姚闢等承
詔編定周公春秋廣謚沈約賀琛庾蒙六家謚法

八年上之意有所未盡乃又講求六家外採今文

尚書汲冢師春蔡邕獨斷諸書考其得失別為嘉

祐謚法三卷謚錄三十五卷

宋史志二十卷應是南宋亡失曾鞏

謂其謚法藏於有司宗孟謂世不得傳中秘獨有

之則書雖一人所為實一代之經制也今觀其書

於謚義多所增改如聖不可知曰神取之孟子窮

理盡性曰聖取諸易繫辭大而難名曰堯取諸論

語仁聖盛明曰舜取之小戴記見于自注者甚明

至其所列謚字刪去周書帝皇王公侯德殤甄勝
懿譽度知糠醜惑推長繆等十九謚史記君僖惠
抗四謚獨斷黃字一謚增多賢禹章強以下七十
謚鄭樵云洵承詔編定六家謚法斷然有所去取
又云蘇氏所取者百六十八謚所去者百九十八
謚則其謚實一取于古無有臆剏足備漢魏以來
之軼典爰取其增多字逐一標列仍以歷代經用
者附證如左

行義合道曰賢

宋太祖女魏國大長公主謚賢肅魯國大長公主謚賢靖蓋賢謚自宋始用之

淵源通流曰禹受禪成功曰禹

於堯舜外增多禹謚蓋亦舊儒附會相傳已久者
法度明大曰章敬慎高亢曰章出言有文曰章

後漢孝章帝始謚章本紀註引謚法溫克令儀曰章
應是沈賀諸家相傳有此義蘇洵刪

和而不流曰強中立不倚曰強守道不變曰強死而不遷
情曰強自勝其心曰強

梁光祿大夫江革謚強

致果殺敵曰毅強而能斷曰毅

梁尚書左丞江子四元帝時謚毅蓋謚毅之始見史
傳者

勝敵克亂曰壯武而不遂曰壯

史表有廣嚴壯侯召歐博陽壯侯陳淳並于高祖六

年十二月甲申受封侯此前史諡壯之始

好力致勇曰果

漢更始將軍廉丹始諡果後周諡襄國公李端唐諡
定州刺史于匡濟亦用此

肇敏行成曰真不隱無屏曰真

唐睿宗諡大聖真皇帝攷史記魯世家有真公濞索
隱曰真音慎本亦作慎則魯公濞本諡慎傳寫誤真
也

思慮不與曰原

周書作思慮不與曰愿愿與原古通本書既改周書
愿作原而又以弱無立志訓愿則分為兩諡矣未知
何據

綜善典法曰曷

行見中外曰顯

周三十五傳為顯王疑是周公諡法所有周書失去
者

舍和無欲曰玄

唐天寶十三載加睿宗諡為玄真大聖大興孝皇帝
德覆萬物曰高

漢太祖諡高

功格上下曰光能紹前業曰光居上能謙曰光

後漢世祖皇帝諡光武章懷太子注引諡法曰能紹
前業曰光唐上元元年追諡懿祖曰光皇帝

則天法堯曰大

三國吳孫權諡大皇帝

出類拔萃曰英

宋太宗女魏國大長公主諡英惠

多聞強識曰博

唐左武侯大將軍竇抗本傳諡密通典作諡博又秘

書少監蕭德言諡博

可以作聖曰睿

唐代宗沈皇后諡睿真穆宗諡睿聖

承命不遷曰世

治典不殺曰軍

意深慮遠曰趯

蓄義豐功曰仁慈民愛物曰仁克己復禮曰仁貴賢親

親曰仁

敏事以敬曰慎沈靜寡言曰慎

周有慎靚王魯衛陳皆有慎公

奉義順則曰禮恭儉莊敬曰禮

制事合宜曰義見利能終曰義除去天地之害曰義先
君後已曰義取而不貪曰義

後漢光武帝姊新野長公主建武三年追謚節義蓋
謚義之始見史傳者

守命共時曰信出言可復曰信

漢海陽齊信侯搖毋餘昌武靖信侯單甯並高祖六
年受封蓋謚信之始見前史者武帝時塞侯直不疑
亦謚信

質直而好義曰達疏通中理曰達

隋岐州刺史鄭譯開皇十一年謚達蓋謚達之始見
史傳者

含光得衆曰寬

梁宗室廣信侯蕭暎謚寬

才理審諦曰理

梁潯陽太守到洽謚理後周驃騎大將軍邵陽伯薛
寘亦謚理蓋理謚始用於南北朝時

中心樂易曰凱

後梁蕭詧中書監安豐公蔡大寶謚文凱

避遠不義曰清

北魏驍騎大將軍刁雙興和三年謚清穆蓋謚清之

始見史傳者

遷善改過曰益取於人以為善曰益

德性溫恭曰基

後周廣城郡公段永天和四年謚基

視民如子曰慈

宋宗室高密郡王趙德恭明道中謚慈哲

追改前過曰鼎

秉心塞淵曰深

德性寬和曰溫

梁鴻臚卿顧協侍中王訓陳廣德侯章景明尚書右
僕射王勣唐絳州刺史孔禎謚溫

推功尚善曰讓

唐睿宗長子寧王憲謚讓皇帝攷王莽謚王根為直道讓公則謚讓者始於莽之偽謚矣

追補前過曰密

北魏孝明杜皇后始謚密樂陵王元思譽唐左武侯大將軍竇抗皖城郡公張儉並謚密

孰一不遷曰介

宋右正言陳永謚文介知鄧州劉汲知麟州楊震父宗閔謚忠介介本美謚而鄭志列之下謚之十九言

謂將用之小人抑何誣也

中正精粹曰純

宋忠州團練使趙仲恕謚純熙程子於嘉定十三年
謚純

行見中外曰敵

達禮不達樂曰素

宋張舉謚正素先生

卑而不可踰曰謙

宋劉虞謚謙靜先生

睦于兄弟曰友

衆方益平曰儆

元江西省參政全布延薩里死於陳友諒謚儆哀

追補前過曰攝

美化及遠曰廣所聞能行曰廣

唐太宗增謚文武大聖大廣孝皇帝

言行不回曰淑

元定宗烏拉海額實后謚欽淑

獻敏成行曰草

思愆深遠曰懼

謀慮不成曰息

漢虛水侯劉爵五鳳四年謚息

舉事而遲曰舒

北齊河南王高孝愉謚康舒

或作康獻

幼少短折曰冲

後漢孝冲皇帝紀注引謚法曰幼少在位曰冲晉有東海冲侯司馬祇宋有臨慶冲王劉休倩

質勝其文曰野敬不中禮曰野

後周宗室越王宇文盛大象二年為隋文帝所害謚野

菲薄廢禮曰儉

剛克好勝曰伐

涼德薄禮曰虛

寵祿光大曰榮先利後義曰榮

宋宗室豫章王趙宗諤榮孝定王趙元良諡榮易
吳王趙顥諡榮懷王趙宗暉諡榮穆此外諡榮者甚
多蓋宋代習用

好內遠禮曰蕩好智不好學曰蕩狂而無據曰蕩

後周晉公宇文護追諡蕩

色取仁而行違曰聞

後周有滕聞王宇文通

貪以敗官曰墨

宋侍中錢惟演卒太常張瓌初請謚文墨後改文僖
言行相違曰僭自下陵上曰僭

後周趙王宇文招以謀誅隋文帝見殺謚僭

高而無民曰亢知存而不知亡曰亢

犯國之紀曰干

心隘不容曰褊

後梁明帝子蕭瑀唐太宗以其性忌謚貞褊

違命自用曰專

唐太常博士張星議御史中丞宋慶禮之謚引謚法
好功自是曰專後慶禮改謚敬

薄德弱志曰輕

煩酷傷民曰苛

以勢致君曰要

蘇洵嘉祐謚法新義

臣等謹案蘇洵嘉祐謚法增改舊謚義其書乃奉

詔編定故終宋世行之下至明代亦依是為增損
今取其謚與周書獨斷同而義異者別為新義逐
條標列其有一二字更改及移彼釋此者亦為注
明至於全不相關者仍不加辨焉

聖不可知曰神

行道化民曰聖窮理盡性曰聖

大而難名曰堯

雲行雨施曰湯

施而中理曰文敏而好學曰文脩德來遠曰文忠信接
禮曰文剛柔相濟曰文脩治班制曰文

保大定功曰武剛強以順曰武

周書以順作直理

闢土斥境曰

武折衝禦侮曰武

禮樂明具曰成刑名克服曰成

周書此句作武字義

持盈守滿曰

成遂物之美曰成通達強立曰成

撫民安樂曰康溫良好樂曰康

周書撫民安樂作安樂撫民溫良作溫年別有

溫良好樂曰良

欽定四庫全書

欽定續通志

卷一百二十

十三

嚮忠內德曰獻

周書作惠無內德考周書獻謚有三義此書取其二其博聞多能一義別作憲

謚義與史記正義同

柔克有光曰懿

周書作溫柔聖善後文有柔克為懿

體仁長民曰元

耆意大圖曰景

史記正義作者意大慮獨斷作致志大圖

施而不私曰宣善聞周達曰宣誠意見外曰宣

周書史記作聖

善周聞施而不成

任賢致遠曰明總集殊異曰明獨見先識曰明能揚仄

陋曰明察色見情曰明

明德有功曰昭

周書作昭
德有勞

畏天愛民曰敬齋莊中正曰敬夙夜就事曰敬

就事周
書作恭

事

受命不遷曰敬死不忘君曰敬陳善閉邪曰敬

卑以自牧曰恭不懈為德曰恭治典不易曰恭責難於

君曰恭

嚴敬臨民曰莊威而不猛曰莊履正志和曰莊

周書後
文有履

亡為
莊

正已攝下曰肅

因事有功曰襄

周書作甲
冑有勞

安民有功曰烈

周書作有
功安民

克亟成功曰桓

賞勸刑怒曰威以刑服遠曰威

率義共用曰勇

秉義行剛曰克愛民作刑曰克

周書作愛
民在刑

兆民寧賴曰安

絕行不與曰定

絕行周書作純行

追補前過曰定

與前密字攝字義同周書

無此義有追補前過曰剛句

治典不殺曰簡正直無邪曰簡

治典不殺史記訓初謚獨斷訓震謚此書既仍

獨斷震謚義又以之釋簡謚可謂兩岐無定矣

固節幹事曰貞圖國忘死曰貞

謹行制度曰節

湟而不緇曰白

以法正國曰匡

中正無邪曰質

恭仁鮮言曰靖

周書作恭已
鮮言曰靜

慈和徧順曰順和比於理曰順

周書徧順
作徧服

安民好靖曰夷

周書作安
心好靜

謀慮不僭曰思念終如始曰思

大慮方行曰考

周書後文
有考成也

保民畏慎曰胡稱年壽考曰胡

周書作保民者
父彌年壽考

柔遠能邇曰和號令悅民曰和不剛不柔曰和推賢讓

能曰和

周書後文有和會也

賞善罰惡曰憲博聞多能曰憲行善可記曰憲

周書無憲諡有

獻諡此博聞多能曰憲周書作獻史記正義作憲

磨而不磷曰堅

能養能恭曰孝繼志成事曰孝幹蠱用譽曰孝

盛讓純固曰忠臨患不忘國曰忠推賢盡誠曰忠廉公

方正曰忠

尊明勝患曰智默行言當曰智推芒折廉曰智臨事不

惑曰智察言知人曰智擇任而往曰智

周書作知

行歸忠信曰周事君不黨曰周

應事有功曰敏

周書後文有敏疾也

治亂守正曰直不隱其親曰直

周書止肇敏行成曰直無此二義

敬事節用曰欽

小心敬事曰良

強毅敦樸曰厚

能修其官曰勤

周書後文有勤勞也

治定不陂曰祁

史記作治
典不殺

失位而死曰懷

未中身夭曰悼

周書作年
中早夭

懷情不盡曰隱

好更故舊曰易

周書作好
更改舊

不主其國曰聲

周書作不
生其國

未及而動曰躁

動靜亂常曰幽

周書作動
祭亂常

弱無立志曰愿

周書作思慮
不與曰愿

鄭樵謚畧增多謚

臣等謹案鄭樵作謚畧序論五篇謚法三篇後論
四篇序論言謚以諱事神為昭穆之次非美刺之
法惡謚非所以加於君父桀紂是名非謚幽厲桓
靈皆非惡謚又言美惡即文而見不即說而見故
所取謚只以一文見義蘇氏不取周書帝皇王公
侯君師長胥之稱已亦不取堯舜禹湯桀紂等字

表裏蘇氏為典禮之大謚法言上謚百三十一用
之君親用之君子中謚十四用之閔傷用之無後
者下謚六十五用之小人皆所以備典禮後論言
已與蘇氏各有去取辨駁詳盡實已深挾謚法之
奧今即三類二百十言有文無義其已見於周書
蔡氏蘇氏諸篇者不復贅錄其增多未見者謹標
而列之著於篇仍以歷代經用之謚疏證其下并
撮序其論著之大畧如此云

絜 宋兵部侍郎司馬朴謚忠潔禮部侍郎譚世勛高
宗時不受張邦昌偽命謚端潔潔與絜古通

賁 漢戚侯季必孝文四年謚賁

逸

退

訥

僊

迷

懋

宜

哲

察

通

金宗室都元帥宗誥謚通敏

儀

唐憲宗女鄭國公主謚溫儀

經

庇

協

端

漢書表有煮棗端侯草朱乃高祖十二年功臣侯

而史表作靖侯史表有范湯端侯代乃中元三年以
匈奴王降侯者而漢書表作靖端靖二字篆文相近
故傳寫易訛然謚端謚靖未詳孰是姑識之以備考
休
史記宋世家有休公田

悅

綽

容 北魏宗室廣陵王欣恭帝時謚容此謚容之始見
史傳者

確 宋汾州守張克戢紹興中為金人所攻破力屈死謚
忠確

恒

熙 後梁開平元年追謚曾祖妣范氏為宣熙皇后

洽

右上謚法

邨

無考

右中謚法

暴

虐

復

悖

凶

慢

忍

毒

惡

殘

哭

後周宗室代王宇文達與越王盛同遇害諡哭

攘

頑

昏

驕

梁神威將軍蕭子顯大同三年敕以恃才傲物謚

驕

醜

酒

僥

狃

侈

靡

弱

偽

陳侍中徐陵至德元年謚章偽

妄

譴

諂

誣

詐

譎

訕

詭

奸

邪

慝

蠱

危

圯

儒

撓

覆

敗

斃

疵

饕

費

右下謚法

明通用謚法增多謚

臣等謹案謚法自宋嘉祐而後全用蘇氏元雖或更草未有成書至於明世頗加損益間著新義太祖謚中山王徐達曰寧非前書所有蓋規模又一變矣紀明之謚者有張志淳謚法二卷何三省帝后尊謚紀畧一卷鮑應鰲皇明臣謚彙考二卷葉東敬皇明謚考三十八卷郭良翰皇明謚紀彙編

二十五卷諸書皆不行惟王世貞謚法通紀全載
本集自云徧考國史及秘閣諸籍參以家乘靡所
不備然猶不如王圻謚法考所載皇明通用謚較
為明簡圻之為謚法考也先編各書謚義次輯歷
代經用謚其所輯各依正史紀傳按次排比搜攬
幾於靡遺至所編謚書於周公謚法取史記而不
取汲冢獨斷而外於春秋廣謚沈約賀琛諸家及
左氏內外傳注史記兩漢書注所引古謚法絕無

採取獨取宋蘇氏鄭氏于蘇氏書又未見其本蘇氏本一百六十八謚圻止列九十二謚內又竄入端通修恪敦容裕潔確九謚非洵書之所有謚義又多與洵不合獨所載明通用謚法首列文武成康等有謚義者六十八謚次列寧慎冲淑善崇無謚義者六字別有當代經用謚義未備者恒淳高睿等二十五字又於後文摭列事實補其缺遺視王世貞之書可謂詳備矣今取其增多字逐一標

列仍以史傳經用者附證其下至其全文與蘇氏
以上謚書同者不備列焉

強學好問曰裕

宋宗室侍中東平郡王德文仁宗時謚恭裕元成宗
母鴻吉哩后謚徽仁裕聖至順三年追封顏無繇為
杞國公謚文裕

勤其世業曰修

宋吏部尚書胡宗愈謚修簡此謚修之始見史傳者

敬共官次曰恪盛容端嚴曰恪溫恭朝夕曰恪

唐文宗太子諡曰莊恪唐尚書右丞工部尚書楊昉
諡恪杜佑曰恪字諡法所無考史記有牧邱恪侯石
慶漢書作恬侯檢諡法亦無恬字史漢異同未詳孰
是據杜氏所言則唐以前未有諡恪者以昉為始

三諡
有義

寧 明初諡中山王徐達

善 弘治中諡夫人項氏曰榮善

崇漢宗室蠡吾侯劉翼桓帝之父帝即位謚為孝崇
皇洪武初謚合浦侯陳清曰崇武弘治中謚夫人胡

氏曰崇善夫人姚氏曰崇敬

以上三言
脫去謚義

明通用謚法新增義

臣等謹案明王圻謚法考所載明通用謚法大要
本於王世貞謚法通紀其有釋義者皆閤籍也有
周書不為蘇洵所取而茲取者如於武則取剛強
直理刑名克服於成則取安民立政之類有蘇氏

新創義而茲屏不取者如於明則不取能揚仄陋
於恭則不取治典不易責難於君之類惜所列止
六十八諡於明史諸臣用諡良多未備終非全書
今取其新增諡義照前代各書例逐一標列至其
時經用為諡而義軼者不另列焉

道德純一曰元

敬順事上曰恭正德美容曰恭

守禮執義曰端

物至能應曰通事起而辨曰通

明德有盛曰賢

施勤無私曰惠

柔克有光曰和

周書後文有和會也蘇洵
謚法作柔克有光曰懿

柔德教衆曰靜

臨難不懼曰勇

致果殺敵曰剛強而能斷曰剛

此二義蘇洵謚
法作毅謚義

勝敵志強曰壯敵圍見服曰壯死于原野曰壯兵甲亟

作曰壯履征殺伐曰壯

表裏如一曰慤

不污不義曰潔

無過為僖小心恭慎曰僖

周書作有過為僖

好學近智曰果

善行不怠曰毅溫仁忠厚曰毅能紀國善曰毅

寬裕溫柔曰容

歷代諡法補遺

臣等謹案周書合汲冢史記本共一百三十五諡
經用者八十四諡蘇洵諡法增多七十諡經用四
十七諡鄭樵通志增多七十一諡經用十一諡而
歷代史傳所載已用諡不見於諡書者自共和以
前魯鄭諸邦已有之戰國兩漢而後不可勝紀蓋
著作之始不過預定若干諡原不能必後人之盡
用而政教既衰王章漸廢列國諸侯人自為政雖
田賦職官之大多有不循乎周禮者况諡法乎况

秦漢以下乎且又重以魯魚亥豕之易訛國史家
乘之歧出隸事者循其所採而不究其由來讀書
者專於一編而不博乎異本遂至書與謚各不相
符亦勢之所無如何也臣等綜觀歷代用謚不見
于謚書者仍博採之以補謚書之缺遺爰自周初
迄於明代各以史傳按次編列以備考焉

鄭 燕有鄭公

宮 蔡曹皆有宮伯

利 陳有利公

赧 周有赧王

于 漢景帝子膠西王端宗室安郭侯傳富柳侯自為
並諡于史記索隱廣周書諡法優能其德曰于蓋美
諡也考蘇洵別有犯國之紀曰干而王圻諡法考遂
以端等三人為諡干誤矣傳富史表作傳

綱 漢有清河綱王

令 漢有周呂令武侯呂澤史記索隱曰周呂國也令

武諡也

終 漢鄧侯蕭何諡文終安國侯王族秣陵侯劉繆什
邠侯雍桓並諡終考汲紹侯公上不害史表亦作終
侯

制 漢有高宛制侯丙猜崩成制侯周縲
祇 漢衍侯翟山橐侯陳錯並諡祇

中 漢羹頡侯劉信厭次侯元頃高胡侯陳夫乞並諡
中元頃漢書表作爰類

穀 漢有祁穀侯繒賀史記索隱曰謚法行見中外曰

穀

慶 漢卽侯黃榮盛謚慶

虎 漢有廣陵虎侯劉表史表作常侯劉表考常謚亦

諸家所未載

敷 漢有定敷侯劉越柳敷侯劉罷師史記索隱曰敷

謚也說文云敷讀如躍

恬 漢有牧邱恬侯石慶攷史記作恪侯馬端臨封建

考王圻謚法考俱從漢書表作恬

敦 漢宗室劉光元封六年謚敦此敦謚之始見于史
傳者

肥 漢常樂侯稠雕謚肥稠雕漢書衛青傳作雕離

衍 漢耶會侯劉仁挾術侯劉昆景謚衍漢書表作扶
滯侯劉昆吾

昌 漢都昌侯朱充謚昌

刻 漢成安侯郭賞謚刻

鄧 漢成安侯郭長謚鄧長乃刻侯賞之子

道 王莽追謚王根為直道讓公又北魏太祖謚道武

皇帝

睦 王莽妻謚孝睦皇后

熹 後漢孝和帝鄧皇后謚和熹北魏陰平王元烈亦

謚熹

太 魏謚曹嵩為太皇帝北魏世祖亦謚太武

禧 晉安帝王皇后謚僖

淵 宋洮陽侯宗慤謚淵

替 梁蕭通明卒有司按謚法言行相違曰替

脫 陳周敷謚脫

惕 北魏南皮靈侯高佑初有司議謚惕詔以不遵上

命謚靈

愷 北魏康成縣公柳帶韋謚愷

實 北魏滄州刺史堯傑謚實

闇 隋文帝謚岐國公斛斯徵用之

縱

唐左衛大將軍宇文士及初謚為恭劉洎駁之改

謚曰縱

晟

宋黥卒魏漢津以鑄九鼎賜號冲顯處士卒謚為

嘉晟侯

柔

遼義宗后謚柔貞

默

金德祖謚淵默皇帝

濟

金宗室鄭國公們圖琿謚定濟京兆尹隋國公和

尼謚貞濟

傑 金太傅托卜嘉諡傑忠

亮 元永平郡公阿勒台諡忠亮

嘉 元漆水郡公耶律希亮諡忠嘉

遂 元寧夏郡公安巴代國公鄂拓克齊並諡忠遂

淳 明太祖追諡考為仁祖淳皇帝

愍 明熹宗諡愍皇帝

欽定續通志卷一百二十

欽定四庫全書

欽定續通志卷一百二十一

謚畧

臣等謹案謚法起於周而累朝賜謚之典多與周異周制君臣不嫌同謚至晉太康中則以同號為嫌矣周漢定謚或用單文或兼兩字各視其所宜無所輕重後世則以單謚複謚為升降矣至於追謚之恩改謚之議奪謚之條累朝定制互有等差



而立法失宜者莫如唐之議謚駁謚蓋其制以太
常掌定議以考功掌駁正其有子孫陳訴復下三
省官叅議然定議者不能無愛憎而駁正者復有
所向背馴至章奏紛然互相詰難因以啓黨援邀
結之術非惟不足以定公評亦非所以成政體也
夫無爵者無謚禮有明文賜謚者不可以私冀猶
爵祿之不可倖邀王者受命于天故稱天以謚人
臣受爵于君則君賜之謚禮樂必自天子出始能

昭彰輝之大權是豈得專責於太常又奚必預設
駁正之官徐議其後哉鄭志祇載三等之謚於累
朝制度闕而不載今上采經傳旁及漢晉以及元
明定謚之制錄其有關証據者以補鄭志之闕即
唐人議謚駁謚之文亦畧存梗概用以考其得失
焉

歷代謚議

周禮春官太師帥瞽而厥作匱謚

太史小喪賜謚

小史卿大夫之喪賜謚讀誄

儀禮士冠禮死而謚今也古者生無爵死無謚

臣等謹案禮記郊特牲亦有此語

禮記曲禮君子已孤不更名已孤暴貴不為父作謚
檀弓幼名冠字五十以伯仲死謚周道也

又公叔文子卒其子戌請謚於君曰日月有時將葬矣
請所以易其名者君曰昔者衛國凶饑夫子為粥與國

之餓者是不亦惠乎昔者衛國有難夫子以其死衛寡人不亦貞乎夫子聽衛國之政修其班制以與四鄰交衛國之社稷不辱不亦文乎故謂夫子貞惠文子表記先王謚以尊名節以壹惠恥名之浮于行也樂記聞其謚知其行也

春秋左傳無駭卒羽父請謚與族公問于衆仲對曰天子建德因生以賜姓胙之土而命之氏諸侯以字為謚因以為族

又楚子疾告大夫曰不穀不德少主社稷生十年而喪先君未及習師保之教訓而膺受多福是以不德而亡師于鄢以辱社稷為大夫憂其弘多矣若以大夫之靈獲保首領以歿惟是春秋窳窳之事所以從先君于廟者請為靈若厲大夫擇焉莫對及五命乃許秋楚共王卒子囊謀諡大夫曰君有命矣子囊曰君命以共若之何毀之赫赫楚國而君臨之撫有蠻夷奄征南海以屬諸夏而知其過可不謂共乎請諡之共大夫從之

又衛侯賜北宮喜謚曰貞析朱鉏謚曰成子

臣等謹案事見左傳昭公二十年杜注云皆未死

而賜謚

穀梁傳謚所以成德也于卒事乎加之

論語子貢問曰孔文子何以謂之文也子曰敏而好學
不恥下問是以謂之文也

又公叔文子之臣大夫僎與文子同升諸公子聞之曰
可以為文矣

史記秦始皇追尊莊襄王為太上皇制曰朕聞上古有號無謚中古有號死而以行為謚如此則子議父臣議君也甚無謂朕弗取焉自今以來除謚法朕為始皇帝後世以數計二世三世至於萬世傳之無窮

白虎通德論謚者何也謚之為言引也引列行之迹也所以進勸戒上務德也故禮郊特牲曰古者生無爵死無謚此言生有爵死當有謚也死乃謚之何言人行終始不能若一故據其終始可知也士冠禮曰死而謚之

今也所以臨塋而謚之何因衆會欲顯揚之也黃帝先
黃後帝何古者質死生同稱各持行合而言之美者在
上黃帝始制法度得道之中萬世不易名黃自然也後
世雖聖莫能與同也後世德與天合亦得稱帝不能立
制作故不得稱黃也謚或一言或兩言何文者以一言
為謚質者以兩言為謚故尚書曰高宗殷宗也湯死後
世稱成湯以兩言為謚也號無質文謚有質文何號者
始也為本故不可變也周以後用意尤文以為本生時

號令善故有善謚故合文武王也合言之則上其謚明
別善惡所以勸人為善戒人為惡也帝者天號也以爲
堯猶謚顧上世質直死後以其名為號爾所以謚之爲
堯何爲謚有七十二品禮記謚法曰翼善傳聖謚曰堯
仁聖盛明謚曰舜慈惠愛民謚曰文彊理勁直謚曰武
幼不誅長賤不誅貴諸侯相誅非禮也臣當受謚于君
也卿大夫老歸死有謚何謚者別尊卑彰有德也卿大
夫歸無過猶有祿位故有謚也顯號謚何號法天也法

日也日未出而明謚法地也法月也月已入有餘光也

臣等謹案以黃帝堯舜為謚自白虎通始抱朴子
曰上古無謚始于周家耳黃帝謚蓋後人追為之
非當時羣臣之稱也此說可以證班固之誣

五經通議曰謚之言列陳列所行善有善謚惡有惡謚
以為勸戒也

鄭志趙商問曰曲禮曰已孤暴貴不為父作謚而武王
即位追王太王王季文王改謚爵何也答曰周道之業

興於二王功德由之王迹初焉凡為人父豈能盡賢乎
若夏禹商湯則不追謚矣

說文解字謚行之迹也从言兮皿

釋名謚曳也物在後為曳言名之于人亦然也

風俗通義禮臣子無爵謚君父之義也故羣臣累其功
美莖日遣太尉于南郊告天而謚之

荀氏家傳荀爽對策曰臣聞火生于木故其德孝漢之
謚帝稱孝者其義取此也

臣等謹案顏師古注漢書曰孝子善述父之志故漢家之謚自惠帝以下皆稱孝苟爽惑於識諱之書而以火生於木為說陋矣

後漢書祭遵卒博士范升上疏曰禮生有爵死有謚爵以殊尊卑謚以明善惡臣愚以為宜因遵薨論叙衆功詳案謚法以禮成之顯章國家篤古之制為後嗣法

通典魏劉輔等啓論賜謚云古者存有號則沒有謚必考行迹論功業而為之制漢不修古禮大臣有寵乃賜

之謚今國家因用未革臣以為今諸侯薨于位者可有
謚主者宜作得謚者秩品之限尚書衛覬奏舊制諸王
及列侯薨無少長皆賜謚古之有謚隨行善惡非所以
優之又次以明識昭穆使不錯亂也臣以為諸侯王及
王子諸公侯薨可隨行迹賜謚其列侯始有功勞可一
切賜謚至于襲封者則不賜謚尚書趙咨又奏云其諸
襲爵子嗣無殊才異勲于國及未冠成人皆不應賜謚
黃門侍郎荀攸議以為古之謚紀功懲惡也故有桓文

靈厲之謚今侯始封其以功美受爵土者雖無官位宜皆賜謚以紀其功且旌奉法能全爵祿者也其斬將搢旗以功受爵而身在本位類皆比列侯自關內侯以下及名號賜爵附庸非謚所及皆可闕之若列侯襲有官位比大夫以上其不涖官理事則嘗宿衛忠勤或身死王事皆宜加謚其餘襲爵既無功勞官小善微皆不足錄八座議以為太尉荀顗所撰定體統通叙五等列侯以上嘗為郡國太守內史郡尉牙門將騎督以上薨者

欽定四庫全書

欽定續通志

卷一百二十一

皆賜謚

晉書景帝紀魏正元二年謚景帝曰武公文帝表讓曰臣亡父不敢受丞相相國九命之禮亡兄不敢受相國之位誠以太祖嘗所階歷也今謚與二祖同實所祇懼昔蕭何張良霍光咸有匡佐之功何謚文終良謚文成光謚宣成必以文武為謚請依何等就加詔許之謚曰忠武

臣等謹案魏初謚晉宣帝曰文至是謚景帝曰武

蓋與魏武魏文二帝同謚故表云謚與二祖同也
乃改宣帝謚宣文景帝謚忠武君臣同謚之嫌實
始于此

晉書禮志武帝太康八年十月太常上謚故太常平陵
男郭奕為景侯有司奏云晉受命以來祖宗號謚羣下
未有同者故郭奕為景與景皇同不可聽宜謚曰穆王
濟羊璞等並云夫無窮之祚名謚不一若皆相避于制
難全如悉不避復非推崇事尊之禮宜依諱名之例但

及七廟祖宗而已不及遷毀之廟成粲武茂劉訥並云
同謚非嫌號謚者國之大典所以厲時作教經天人之
遠旨也固雖君父宜有所不隆及在臣子或以行顯故
能使上下邁德罔有殆荒臣願聖世同符堯舜行周同
謚之禮舍漢魏近制相避之義帝詔曰非言君臣不可
同正以奕謚景不相當耳宜謚曰簡

晉書嵇紹傳太尉廣陵公陳準薨太常奏謚紹駁曰謚
號所以垂之不朽大行受大名細行受細名文武顯於

功德靈厲表於閭閻白項禮官協情謚不依本準謚為過宜謚曰繆事下太常時雖不從朝廷憚焉

臣等謹案此後世駁謚之始

晉中興書曰時賜謚多由封爵不考德行王導上疏曰臣聞大行受大名小行受小名則實稱不誣而已近代以來唯爵得謚武官牙門有爵必謚鄉校常伯無爵悉不得謚甚失制謚之本今中興肇建勲德兼脩宜深體前訓使行以謚彰豈可限以有爵中宗納焉自後公卿

無爵而謚自導始也

通典東晉元帝太興三年詔古者賜謚名實相稱頃來有爵乃謚非聖賢本意通議之有司表云劉毅宜謚以申毅忠允匪躬贈右光祿大夫儀同三司斯誠聖朝考績以著勲之美事也按謚者行之迹號者功之表今毅功德並立而有號無謚于義失體竊以春秋之事求之謚主于行而不繫爵然魏相承爵非列侯則皆沒其高行而不加之謚至使三事之賢臣不如野戰之將士臣

願聖代舉春秋之遠制改近代之舊服

臣

等謹案晉書劉毅傳太康六年卒即贈儀同三司羽林左監王宮上疏曰中詔以毅忠允匪躬贈班台司斯誠聖朝考績以著勲之美事也臣謹案謚者行之迹號者功之表今毅功德並立而有號無謚於義失體云云奏寢不報則請謚劉毅乃太康六年毅卒之歲非太興三年也杜佑以王宮疏為有司表率合太興之詔為一事誤矣

晉書禮志永和十一年彭城國為李太妃求諡博士曹
耽之議夫婦行不必同不得以夫諡諡婦春秋婦人有
諡甚多經無譏文知禮得諡也胡訥云禮婦人生以夫
爵死以夫諡春秋夫人有諡不復依禮耳安平獻王李
妃瑯琊武王諸葛妃太傅東海王裴妃並無諡今宜率
舊典王彪之云婦人有諡禮壞故耳聾子為諡服虔諸
儒以為非杜預亦云禮婦人無諡春秋無譏之文所謂
不待貶絕自明者也近世惟后乃有諡耳

臣等謹案通典載王彪之議云婦人無爵既從夫爵則已無實爵以從為稱也以從為稱則無謚可知春秋婦人有謚者周末禮壞耳故服虔注聲子之謚非禮也杜氏注惠公仲子亦云禮婦人無謚泰始以來藩國王妃無有謚者中興敬后登阼乃追謚耳瑯琊武王諸葛妃恭王夏侯妃元帝猶抑蒸蒸之至情不追謚今彭城王妃不應謚其論視禮志稍詳今並錄之

通典東晉瑯琊世子未周而卒大司農表瑯琊世子降君一等宜謚哀愍太常賀循曰謚者所以表功行之日也故古者未居成人之年及名位未脩者皆不作謚也是以周靈王太子總括明智年過成童亡猶無謚春秋諸侯即位之年稱子踰年稱君稱子而卒皆無謚名未成也未成為君既無君謚時見稱子復無子謚明俱未得也唯晉之申生以仁孝遭命年過成人晉人悼之故特為謚諸國無例也及至漢代雖遵茲義過于古禮然

亦未有未踰年之君而立諡也。殤冲二帝皆已踰年方立諡。按哀冲太孫各以幼齡立諡不必依古然皆即位臨官正名承重與諸下定君臣之義尊成體具事無所屈且天下之名至重體其尊者亦宜殊禮故隨時定制有立諡之事也。瑯琊世子雖正體乎上生而全貴適可明嫡統之義未定為諡之證也。

臣等謹案衛懿侯世子蚤死諡曰共伯事在春秋以前世子得諡不始於申生也。循以為諸國無例。

失考矣

又孝武太元四年光祿勳王欣之表伏尋太康中郭奕
諡曰景有司執孝宗同號臣聞姬朝盛明父子齊稱諸
侯與周同諡經諸哲王不易之道也宜遵古典訓範來
裔徐邈議按郭奕諡景詔實不以犯帝諡而改也又惠
帝永平元年詔書貴賤不嫌同號周公諡文君父同稱
名行不殊諡何得異自今以後其各如禮尚書奏文武
舉其一致聖賢有時而同故文王經緯天地孔文子不

耻下問所以為文也遠稽周典嘉號通乎上下近惟太
康改謚非嫺同稱自頃議者或乖體尚之實非所以經
綸無窮永代垂式王欣之所表抑實舊典宜如所陳詔
可

又太常蔡司空謚議云博士曹耽之等議曰謨可謂善
始令終者矣按謚法布德執義曰穆司空左長史孔巖
與王彪之書云博士引禮之義以通高尚之事穆誠是
美謚然蔡公德業既重又是先帝師傅居總錄之任則

是參貳宰相考行定名義存實錄不可不詳彪之答云
按諡法布德執義曰穆謂此名目殊為不輕恭始初張
皇后大寧庾太后並諡曰穆魏司空陳泰王昶賀循皆
名士也並諡曰穆此與蔡公名體相應中朝複諡亦不
勝單安平獻王孚齊獻王攸並單諡自頃複諡者非大
晉舊典必重複諡也蓋是近來儒官相承近意耳皆顧
命重勲或居分陝或處阿衡蔡公存謙素之懷不當此
任於今詠之所以不複諡欲令異于數公所以表冲虛

述德美也又中朝及中興曾居師傅及錄臺事者亦皆不
複謚山李二司徒吾族父安豐侯近賀司空荀太尉周
光祿或曾師傅或曾總錄並不複謚吾謂此謚洪美不
應翻改按謚法條有限而應謚者無限亦何得令名德
必皆齊同遠準周之文武則後代不應復得通用此名
近校晉朝舊比山濤荀顗周顗謚康羊祐荀勗同謚成
此例甚衆不可悉載近朱伯高謚簡時尚書符却已不
應與和嶠同謚蔡為太常據上論可同理甚有義遂便

施行蔡家固當有此故事準例如此復無所為疑

唐六典注諸職事三品以上散官二品以上身亡者佐吏錄行狀申考功考功責厯任勘校下太常寺擬謚訖覆申考功於都堂集省內官議定然後奏聞贈官同職事無爵者稱子若蘊德邱園聲實明著雖無官爵亦奏賜謚曰先生

通典咸通三年太常博士袁思古謚揚州大都督高陽郡公許敬宗曰繆議曰敬宗位以才昇厯居清級棄長

子於荒徼嫁少女於部落聞詩聞禮事絕於趨庭納采
問名惟聞於黷貨白圭斯玷有累清塵易名之典須憑
實行敬宗孫太子舍人彥伯訴屈戶部尚書戴至德問
於博士王福時答曰昔晉司空何曾既忠且孝徒以日
食萬錢所以貶為繆醜況敬宗忠孝不逮於曾飲食男
女之累過之而定謚為繆無負於許氏矣詔令尚書省
集五品上重議禮部尚書楊思敬議稱案謚法既過能
改曰恭請諡為恭

臣等謹案楊思敬舊唐書作袁思敬考新唐書宰相世系表隋觀德王楊士雄第四子曰續續次子曰思敬官禮部尚書駙馬都尉蓋尚唐高祖女安平公主者也舊唐書誤

景雲元年太常諡贈荊州大都督舒國公韋巨源曰昭戶部員外郎李邕駁曰三思引之為相阿韋託之為親無功而封無德而祿同族則醜正安石他人則附邪楚客謚之曰昭良恐未當博士李處直請依前定時雖不

從邕議而論者是之

舊唐書太常博士張星謚贈工部尚書宋慶禮曰專議
曰慶禮太剛則折至察無徒有事東北所亡萬計所謂
害于而家凶于而國案謚法好功自是曰專禮部員外
郎張九齡駁之曰慶禮在人苦節為國勞臣一行邊陲
三十年所戶庭可樂彼獨安於傳遞稼穡為艱又能實
于軍廩莫不服勞辱之事而匪懈其心守貞堅之規而
自盡其力請以所議更下太常庶素行之迹可尋易名

之典不墜乃謚曰敬

臣等謹案張九齡駁議全文載於宋慶禮本傳通
典所錄於事實謚義均未顯晰茲據舊唐書節輯
通典開元十八年太常寺議請謚張說為文貞左司郎
中楊伯成駁曰謚者德之表行之迹將以激厲風俗檢
束名教固無虛稱是存實錄准張說罷相制云不肅細
微之人頗乖周順之旨又致仕制云行虧半古防閑周
身未免瓜李之嫌而喧衆多之口且王之有瑕尚可磨

也人之斯玷焉得逭諸謚曰文貞何成勸沮請下太常
更據行事定謚工部侍郎張九齡又立議請依太常為
定未決玄宗為製碑文賜謚曰文貞

永泰中太常博士獨孤及謚贈涼州都督太原郡公郭
知運曰威右司員外郎崔履駁之曰郭知運承恩詔葬
向五十餘年今請易名竊謂非禮謹案禮經云禮時為
大又曰過時不及非禮也昔衛公叔文子卒將葬其子
戌請謚于君曰日月有時將葬矣請所以易其名者蓋

時不可踰也節度既沒名不浮行數紀之前門生故吏
已合謀謚今乃申請竊將有為而作嗣子英又頃屬多
故屢制方隅朝廷策勲位表端揆附從者竊不中之禮
合無妄之求况今裂土者接軫專征者百輩若率而行
之誰曰無請不惟有司疲于簡牘抑恐名器等于草芥
雖欲曲全竊將不可又禮經云已孤暴貴不為父作謚
若知運合謚而不以其時則嗣子廢先君之德若不合
謚而苟遂其志則先君因嗣子而見尊以僕射而言恐

貽越禮之讓以國家而言又殊旌善之體請下太常寺
重議及答曰禮時為大順次之將葬易名時也有故闕
禮追遠請諡順也公叔戌請諡適當葬前謹案三百禮
經三千威儀曾不言已葬則不追諡况三王殊塗不相
沿禮新禮則死必有諡不云日月有時今請易名者五
家無非葬後苗太師一年矣呂誼四年矣盧奕五年矣
顏杲卿八年矣並荷褒寵無異同之論獨知運不幸遂
以過時見抑苟必以已葬為節制則八年與五十年其

緩一也而與奪殊制無乃不可乎議云已孤暴貴不為父作謚此謂其父無位而子居貴位不當以子之貴加榮于父若知運者處方面重寄列位九卿茂勲崇名與衛霍侔飾終之禮宜加于他將一等豈待因嗣子之德然後作謚今之征鎮者率多起屠販皂隸之中雖逢風雲化為王侯而其間祖父爵位與知運等當請謚者有幾何乃懼名器等于草芥以是廢禮竊謂近誣竊考載籍徵諸舊章易名之禮請如前議獨孤及又謚贈吏部

尚書呂諲曰肅度支員外郎嚴郢駁曰今所議荆南之政詳矣而曰在台司齷齪無匪躬之能者乃抉瑕掩德非中道之言也國家故事宰臣之諡皆有二字以彰善旌德焉夫以呂公文能無害武能禁暴貞則幹事忠則利人盛烈宏規不可脩舉傳叙八元之德曰忠肅恭懿若以美諡擬于形容請諡呂公曰忠肅及重議曰謹案舊儀凡沒者之故吏得以行狀請諡于尚書省而考行定諡則有司存朝廷辨可否宜存衆議今駁議撰諡異

同之說並故吏專之恐亂庖人尸祝之分違公器不私之誠且非唐虞師錫僉曰之道謚法在德惡勸善不在字多文王伐崇周公誅淮夷武功盛而皆謚文冀缺恪德臨事甯俞忠于其國文德優而並謚武固知書法者必稱其大而畧其細故言文不言武言武不言文三代以下樸散禮壞乃有二字之謚非古也其源生于衰周漢興蕭何張良霍去病霍光俱以文武大畧佐漢致太平其事業不一一文不足以紀其善于是有文終文成

景桓宣成之謚雖蹟禮甚矣然猶褒不失人唐興參用
周漢之制以魏徵為文貞蕭瑀為貞褊其杜如晦王珪
封德舉陳叔達溫彥博岑文本唐休璟魏知古崔日用
並當時赫赫以功名居宰相者諡不過一字不聞子孫
佐吏有以字少稱屈者由此言之二字不必為褒一字
不必為貶若褒貶果有字數則是堯舜禹湯文武成康
不如周威烈慎靚也齊桓晉文不如趙武靈魏安釐也
杜如晦王珪以下或成或明或懿或憲不如蕭瑀之貞

禍也以諶之從政威能開邪德可濟衆故以肅易名而
忠在其中矣亦猶隨會甯俞之不稱文豈必因而重之
然後為美魏晉以賈詡之籌算賈逵之忠壯張既之政
能程昱之智勇顧雍之密重王渾之器量劉惔之鑒裁
庾翼之智畧彼八君子者方之東平宜無慚德死之日
並謚曰肅當代不以為貶何嘗微一字二字之升降乎
上稽前典下據甲令參之禮經而究其往事請依前定

臣等謹案晉書王渾傳渾本謚元獨孤及引為謚

肅之證蓋臨文時未詳考耳

大歷十三年太常諡贈司徒楊綰曰文貞比部郎中蘇
端駁曰夫道德博聞曰文清白守節曰貞且元載與司
徒友敬殊深推為長者首舉清要人莫與京及司徒寵
望漸高載畏其偏旋又知載隳壞綱紀心貳于君既懼
其疑因為疎簡有口皆知載惡而獨無一言或有發載
之惡證告未明抱誠坐法者司徒時居上列奏達非難
不能因此披衷陳辭余志士之命露冤狡之私而乃晏

安自恭優游過日使元載禍大滅身竟勞聖上防伺之
慮豈守節不隱邪豈懷道無毒邪非謂文貞明矣洎元
載嗇恩于下招怨于上使北塞人勞有過時之戍西郊
寇至無弔災之惠礪邢堅義之士將死復生梁宋傷夷
之人或寒或餒搜訪旌恤中外所急載皆絕之使王澤
不及于下為行路所嗟而楊公當聖上維新之時居天
下得賢之望誠宜不俟終日造次速言乃寂寥啓悟噤
閉謀猷貪食萬錢之賜虛承一心之顧豈慙惠愛人乎

既由不慈不惠何以謂之文有隱有毒何以謂之貞乎
古者諸侯有國卿大夫有家上以報祖宗下以處子孫
之義也楊公歷處厚俸人謂儒宗曾不立家又無私廟
寧使人老闕敬祖之禮位極無祭禩之宮凡在衣冠誰
不歎恨又乖大義克就愍仁接禮之義矣曰文與貞曷
可以議聖人立諡盡公而無私之謂也所以周宣不敢
私于父諡曰厲漢宣不敢私于祖諡曰矣百王明制歷
聖通則昔公叔文子有死衛之節修班制之勤社稷不

辱方居此謚爰及太宗初魏公徵有匡救公直之忠中
宗末蘇公瓌有保安不奪之節所以諸賢甚衆謚文貞
者不過數公至于燕國公張說先朝輸能名節昭著省
司尚謂不可至今人故稱之由是言之焉可比德請牒
太常更詳他謚以守異章庶乎青史之筆不乖于周漢
黃泉之魂免慙于蘇魏別救謚為文簡

臣等謹案楊綰傳稱蘇端為儉人特異議即指此
事

贈司空陳國公賈抗謚曰博贈左衛大將軍宇文士及
初謚為恭黃門侍郎劉洎駁之曰士及居家侈縱不宜
為恭竟謚為縱工部尚書楊昉謚曰恪定州刺史定襄
郡公于匡濟謚曰果廣州都督謝方叔謚曰勤

臣等謹案杜佑云以上人人謚法所無乃有司一
時之議然漢時有泗水勤王綜王莽時更始將軍
廉丹後周襄國公李端並謚果而牧邱恪侯石慶
史表作恪侯則佑以為謚法所無者未之考耳又

案唐書竇抗傳稱抗諡密與通典異

唐書元和中賜太子賓客于頔諡曰忠初有司諡曰厲至是特易之右丞張正甫封其勅請還本諡補闕高越上疏曰夫諡者所以懲惡勸善激濁揚清使忠臣義士知勸亂臣賊子畏罪孔子修春秋亂臣賊子懼蓋為此也垂範如此尙不能救況又隳其典法乎

五代史同光二年史館事例凡王公百官定諡考功錄行狀并諡議逐月具有無牒報中外官薨已請諡許本

家各錄行狀一本申奏

宋史禮志王公及職事官三品以上薨本家錄行狀上
尚書省考功移太常禮院議定博士撰議考功雷覆判
都省集合省官參議上中書門下宰臣判準始錄奏聞
敕付所司即考功錄牒以未葬前賜其家省官有異議
者聽具議聞蘊德邱園聲實明著雖無官爵亦奏賜諡
曰先生太平興國八年詔增周公諡法五十五字美諡
七十一字為一百字平諡七字為二十字惡諡十七字

為三十字其沈約賀琛續廣謚盡廢後以直史館胡旦
言舊制文武官臣僚皆以功行上下各賜謚法近朝以
來遂成闕典建隆以後臣僚三品以上合賜謚者百餘
人望令史館編錄行狀送禮官定謚付史館修入國史
詔今後並令禮官取行狀定謚送考功詳覆閱送史館
永為定式直集賢院王皞言謚者行之表也善行有善
謚惡行有惡謚蓋聞謚知行以為勸戒六典太常寺博
士掌王公以下擬謚皆跡其功德為之褒貶近者臣僚

薨卒雖官該擬諡其家自知父祖別無善政慮定諡之
際卽其繆戾皆不請諡法竊惟諡法自周公以來垂為
不刊之典蓋以彰善瘴惡激濁揚清使其身沒之後是
非較然用為勸懲今若任其遷避則為惡者肆志而不
悛乞自今後不必候其請諡並令有司舉行如此則隱
匿無行之人有所沮勸若須行狀申乞方行擬諡考諸
方冊別無明証唯衛公叔文子卒其子戌請諡臣謂春
秋時禮壞樂闕公叔之卒有司不能明舉舊典故至將

葬始請諡於君且周制太史掌小喪賜諡小史掌卿大夫之家賜諡以此知有司之職自當舉行明矣詔下有司詳定如皞請焉禮院更議贈安遠軍節度使馬懷德已葬請諡乃言自古作諡皆在葬前唐開元三品以上將葬既啓殯告贈諡於柩前無贈者設啓奠即告諡既葬加諡出於唐時如顏杲卿盧奕盡忠王室當時置而不議至郭知運死五十餘年乃始請諡右司員外郎崔厦以為非旌善之禮而太常博士獨孤及謂新制死不

必有諡又謂有故闕禮追遠請諡順也及長於開元之
世親聞啓奠告諡而謂新制不必有諡豈非誣哉又有
故闕禮追遠請諡皆違禮經何順之有國家給諡一用
唐令然請諡之家例供尚書省官酒食撰議官又當有
所贈道故或闕而不請景祐四年宋綬建議令官給酒
食其後又罷贈遺自此既葬請諡者甚衆歲月浸久官
閑行迹士大夫所不能知子孫與其門生故吏志在虛
美隱惡而有司據以加諡是廢聖人之法而徇唐庸有

司之議也詔自今得諡者令墓前奏請或其家不請則尚書太常合議定諡前葬牒吏館及付其家即徇私諡不以實論如選舉不以實法既葬請諡者不定諡

臣等謹案唐六典有蘊德邱園亦奏賜諡之制宋代因之故元祐中諡邵雍為康節政和中諡徐積為節孝官不過學校而已厥後寧宗理宗表彰儒術嘉定三年諡朱子曰文七年諡張栻曰宣八年諡呂祖謙曰成九年諡周惇頤曰元十三年諡程

伯子曰純程叔子曰正十四年謚張載曰明賢慶
時謚陸九齡曰文達陸九淵曰文安淳祐間謚羅
從彥曰文質李侗曰文靖而朱子高第弟子黃幹
則謚文肅蔡沉則謚文正此皆官未及謚而謚者
宋之謚法頗為冒濫羅泌至謂之辱典而追謚諸
賢以崇尚理學則庶乎得彰瘡之意云

武寧軍節度使鄭國公贈太師中書令夏竦始謚文正
知太常禮院司馬先奏曰臣等切跡謚法本意所謂道

德博聞曰文者非聞見博雅之謂也靖共其位曰正者
非柔懦苟偷之謂也蓋詩云靖共爾位正直是與也今
疎奢侈無度聚斂無厭內則不能制義於閨門外則不
能立效於邊鄙言不副行貌不應心語其道德則貪淫
矣語其正宜則回邪矣此皆天下所共聞非臣等所敢
誣加也乃以文正諡之臣等慙愚不達大體不知將以
何諡待天下正人君子哉伏惟改賜疎諡天下幸甚乃
改諡文莊

司徒岐國公贈太師兼侍中陳執中仁宗時諡恭時禮
官韓維奏曰執中以公卿之子遭世承平因緣一言遂
至貴顯而不能率禮秉道諡法寵祿光大曰榮不勤成
名曰靈執中出入將相以一品就第寵祿大夫矣得任
行政賢士大夫無述焉不勤成名矣請諡曰榮靈詔諡
曰恭

臣等謹案唐宋皆有議論駁諡之制維時太常考
功守官而不阿者固亦有之而是非賢亂知蘇端

之詆譏楊綰則適以滋植黨營私之漸惟宋司馬
先奏夏竦諡韓維議陳執中諡持論侃侃史家稱
之然仁宗時諡法之未愜者匪直加夏竦陳執中
以美諡也藍紀宗諡僖靖張惟吉諡忠安石全彬
諡恭僖盧守勲諡安恪皆宦官也石全彬者雖有
破儂智高功抑厚其賞賚可矣乃寵以使職之不
已又加之美諡且其他如守勲輩則有何功耶唐
世宦官至為橫恣顧得諡者楊復光李輔國而已

宋自真宗作法諡劉承規為忠肅至仁宗習為故
常後世踵之神宗時李舜舉諡忠敏哲宗時梁從
吉諡敏恪李憲初諡敏恪改諡忠敏徽宗時宋用
臣諡傳敏馮世寧諡恭節高宗時康履諡榮節藍
安石諡良恪康誥諡忠定凡宦官得諡者十有餘
人夫以先王尊名之典而至加諸刑餘之奄寺其
瀆禮不經又孰甚焉是烏足以語激揚之大法哉
元史舊令三品以上官立朝有大節及有大功勲于王

室者得賜功臣號及諡

太祖至元二十二年制諡法

臣等謹案元劉致議蕭剡諡引諡法好古不怠曰
敏虞集議陳文靖諡引仕不躁進曰靖柳貫議姚
燧諡引敬直慈惠曰文考周書及蘇洵諸家皆無
此文疑即元所制諡法也

武宗至大二年詔內外百官三品以上者許請諡凡請
諡者許其家具本官平日勲勞政績德業藝能經由所

在官司保勘與本家所供相同轉申吏部考覆呈都省
都省擬準令太常禮儀院驗事蹟定諡若勲戚大臣奉
旨賜諡者不在此例

順帝至元元年命嚴諡法以絕冒濫

臣等謹索元代贈諡之制史志不詳而參考紀傳
則所行異典足資蒐輯者不少樂平民許則祖謀
恢復德興縣遇害諡忠顯亳州民曹彥可不為賊
罵旗而死諡節愍兩人皆以布衣得諡褒死節也

諡處士金履祥為文安許謙為文懿重儒學也諡
揭來成為貞文先生表篤行也諡安南王陳益稷
為忠懿旌外藩之恭順也追諡比干為仁顯忠烈
公箕子為仁顯公以勸忠也追諡杜甫為文貞劉
蕡為文節以崇文也顏子父無繇追諡文裕朱子
父松追諡獻靖尊先賢之所自出也明太祖嘉常
遇春之功諡其曾祖四三曰莊簡祖重五曰安穆
父六六曰靖懿王世貞以為循元之制則元制固

有功高諡及三代者蓋亦易名之異與而史志闕畧不可復考姑擬其可考者以見一代之制焉

明會典凡議諡洪武初俱禮部奉旨施行二十五年令禮部行翰林院擬奏請旨凡親王諡例用一字郡王二字弘治十五年奏準親王行巡撫巡按等官覆勘郡王行本府親王及承奉長史等覆勘善惡得實明白結報具奏本諡

邱濬舉贈諡以勸忠疏臣惟生者之禍福出于一時蒙

蔽衆論之不公人衆者勝天固可僥倖而苟免而事久則論定天定則勝人至于蓋棺事則定矣猶以偏愛之心持不公之論以愚而為賢當尋而反榮是終無天道矣是以三代明王立為諡法以為死後榮辱之典善者予之以美諡惡者予之以惡諡孟子所為孝子慈孫百世不能改而世之庸主嬖臣乃以一己之私而掩天下之公非惟得罪于世教而實得罪于天帝也三代以前君之諡則請命于天臣之諡則請命于君天不言而人

代言人代天言而反天之道天必殛之君不定而俾臣代之臣承君命而負君之託逆天之理違國之法雖一時違于人刑其如天道何唐宋議諡掌于太常博士凡于法應得諡者考其行狀撰定諡文移文吏部考功郎中覆定之本朝雖設太常博士而不掌議諡洪武初惟武臣有諡至永樂中文臣始得諡蓋自姚廣孝胡廣始也自後文武亦多有之然我朝之諡皆出恩賜然臣竊以為九重之上於臣下之賢否未易盡知請自今以後

有應得諡者未賜之先先下所司俾其考定訂議以聞
然後從中賜下如此則得之者以為榮不當得者不因
其親故之屬託其當得者不為朋黨之掩蔽國家激勸
臣子之大法瑞有在于是其為世教之助夫豈細哉

隆慶四年題準凡冒襲王爵奉旨改正者不許一緊請
諡凡文武大臣請諡亦用二字與否取自上裁若官品
未高而侍從有勞或以死勤事特恩賜諡者則不拘常
例

弘治四年令凡乞恩賜諡者禮部斟酌可否務合公論
不許一槩比例濫請

十五年奏準文武大臣有請諡者禮部照例上請得旨
行吏兵二部備查實跡禮部定為上中下三等以行業
俱優者為上行實頗可者為中行實無取者為下開送
翰林院擬諡請旨

萬厯元年題準大臣應得諡者禮部仍廣加咨詢稽覈
名實間有應諡而未經題請及曾題請而未蒙賜諡者

不論遠近許各該撫按及科道官從公舉奏禮部酌議題覆補給若不係公舉子孫自陳乞補諡者不行

十二年題準凡遇文武大臣應得諡號者備查本官生平履歷必其節槩為朝野具瞻勲猷保國家休戚公論允服毫無瑕疵者具請上裁如行業平常即官品雖崇不得槩與

明史萬歷三十一年禮部侍郎郭正域請嚴諡典議奪者四人許論黃光昇呂本范謙應奪而改者一人陳瓚

補者七人伍文定吳悌魯穆楊繼宗鄒智楊源陳有年
閣臣沈一貫朱賡力庇呂本不從其議未幾御史張邦
俊請以呂柟從祀孔廟而論應補諡者雍泰魏學曾等
十四人部議久之共彙題先後七十四人留中不發天
啟元年始降旨俞允又增續請者十人而邦俊原請九
人不與正域所請伍文定等亦至是始定凡八十四人
其官卑得諡者鄒智劉臺魏良弼周天佐楊允繩沈鍊
楊源黃鞏楊慎周怡莊臬馮應京皆以直諫孟秋張元

忤曹瑞賀欽陳茂烈馬理陶望齡皆以學行張銓以忠義李夢陽以文章魯穆楊繼宗張朝瑞朱冠傅新德張允濟皆以清節楊慎之文憲莊杲之文節則又兼論文學云三年禮部尚書林堯俞言諡典五年一舉自萬厯四十五年至今蒙恤而未諡者九卿臺省會議與臣部酌議帝可之然是時遲速無定六年給事中彭汝楠言耳目近則覲記真宜勿逾五年之限又謂三品以上為當予諡而建文諸臣之忠義陶安等之參帷幄葉琛等


之殉行間皆宜補諡事下禮部以建文諸臣未易輕擬
不果行至福王時始從科臣言舉追謚之典則有開國
功臣李善長等十四人正德諫臣蔣欽等十四人天啟
慘死諸臣左先斗等九人而建文帝之弟允熲允熒允
熙子文奎亦皆追補云

臣等謹案明史所稱官卑得諡者特指天啟元年
補諡諸臣而萬厯以前非三品得諡者王世貞明
異典述則稱有三十一人楊恭惠信民以僉都御

史劉文恭鉉以少詹事宋文恪訥李文忠時勉陳
文定敬宗鄒文莊守益以國子祭酒李文通奎劉
文介儼以太常少卿俱四品朱文肅善朝文穆廣
呂文懿原以翰林學士張文僖益以侍讀學士楊
忠愍繼盛以兵部員外郎朱忠定復張恭僖景明
以長史俱五品徐文肅喜述以春坊中允王文靖
汝玉以贊善王忠文禕以翰林待制劉忠愍球以
侍講羅文毅倫舒文節芬以修撰羅文恭洪先以

贊善蔣恭靖用文以太醫院判俱六品鍾恭愍同
以御史七品陳恭愍選以布政使毛忠襄吉周節
愍憲馮恪愍傑許忠節達以憲副岳文肅正以知
府鄧恭毅顥以知縣皆藩臬郡邑外臣雖品秩不
同而或禁近碩德或封疆殉義皆無愧榮名者獨
蔣用文以技藝小臣得之殊為幸耳然用文猶醫
士也方士邵元節諡文康榮靖陶仲文諡榮康惠
肅而王世貞亦述為異典則不啻褻典矣考明代

追諡者五人漢滎澤侯紀信諡忠烈唐詔州刺史
鄧文進諡忠襄宋邕州推官譚必求諡忠愍信國
公文天祥諡忠烈知信州謝枋得諡文節竄先世
之孤忠以激厲風俗乃可為明代之異典云爾



欽定續通志卷一百二十一